


1



玉磬山房遺稿卷之四

眉山王毓宗相甫著

門人温臯謨爾弼甫

詹爾達思理甫較

男王世鴻儀達甫輯

記類

重脩四川會館記

四川會館舊在中城南薰坊下大司馬蹇公與諸大夫實經始之歲時就館為高會脩鄉曲驩

講德尋盟羣賢畢集吾蜀風俗之厚以故頗聞於天下事曠時久共思以餘力增闢之詢謀屢遷其議屢格歲己亥大司馬趙公以少司空來京始欲恢其舊制前館售之得金若干併里中內外縉紳郡邑之守令所入可千金餘乃改卜於城之西偏升其堂軒如也翼如也其後爲燕寢爲燕厦又其後爲園爲臺高明恢廓闕遠森沉燥濕有庇蓋視昔廣十之三焉庶幾乎鄉國之美觀矣今歲春同卿黃公侍御宋公張公都

諫田公司勲卞公與諸大夫復脩往約於是旋鎡若干堂之前爲庭三楹堦墀稱之而鄩部黃公董其事工既訖俾不佞記之蓋不佞讀晉帝道將所謂吾蜀雅頌之聲充塞天衢修德敷讓羽儀上京學士至今誦之煌煌乎烈矣千載而下聲名文物猶可概見乃若心有必致道有不詭琴瑟可同膠漆可合貫終始而不衰歷夷險而益固繇斯以著彙征之吉繼于野之義不佞觀於斯館其取益也忠其取交也和退食自公

選其馨香靜其巾幕飲宴可饗餼同可親毋亦
惟是井里之私爲愉快亦足以暢同心之樂矣
鳳麟萃止元凱偕升天工一心帝載並力百日
之勞一日之澤一張一弛之道也序閱四時之
勝節宣六氣之和上客賦既醉之章主人備既
翁之樂前夔門後劔棧同室一堂之氣象至治
大豫之休徵也昔鄴中蘭亭竹林峴首文雅之
盛止於一邑放達之懷不踰莽蒼得乎此或遺
乎彼固未有先憂後樂在廟廊之上偃仰宴適
似山林之下衆美俱於一時者也智以謀之仁
以居之清地高齊匪喧匪寂揆之里宅則宜濟
濟多士周室以寧以敦睦好狎而不黷脩之禮
讓則順吾濟申縞紵之盟結久要之誼先事之
不墜來事者之賢也若夫扃鑰必慎補葺以時
李宗伯先生有成言矣不佞猶覈音也何能一
辭贊哉

新津縣通濟堰按臺孔公生詞碑記

歲甲辰侍御貴陽李公按蜀與督撫濟南王公
協議條疏便宜檄馬令千里成通濟偃堰就而
眉彭成都衛屯諸田皆爲甘壤語具李宗伯黃
太史記中顧邑按西南上游縮金馬南河之口
堰西受河水不足則益以江江東注如建瓴浸
假而水大溢漸齧城郭有如曩時淫雨衆流淙
滾刺擊著岸直射堰首岸善崩將有沉塌反壤
之害割屢廬而墊溺是委前功於壑也李公還

報闕下而直指中州孔公持斧巡行至邑周
浴民瘼視圖方畧議增石爲枋環以竹落校聯
不絕斷林於林倚而畚揭厚薄旣揣庀其工而
命之護堰者若干文沿江者一百五十餘文約
費若干金米若干斛凡七十餘日江流循隄庶
定乘城而望廬舍相比如雲如虹秭楊權木荻
莽瘠鹵之郊皆熙熙如登春臺如涉析津如探
庶柱陽侯無震蕩之厄郊關有盤石之固氓庶
祝天謝曰維天祐我偏鄙俾康於粒食保我家

室前有兩公去害而利迨公之來毖彼江流益
屹其防利在萬禩惟三公先後一心三公成功
惟殷於民乃合祠而碑之馬令乞撰次其事不
佞讀書九峯山中幸得聞教昔神禹以溝洫肇
平成漢史以河渠埒禮樂以庶而富富而教民
治於是乎成蓋不佞徘徊於離崔沫水之封攬
先民之遺功因思記所言鄭白召杜後先之烈
則益嘆國家歲惟河計之是厯或至破壞深
論以相難極竟無能明計筭商功利使九重

旰食悼功之未成如瓠子宣房故事備未至而
忘之有立而後救之甚哉水之爲利害也直指
頃念蜀久困權政首捐鍰贖以代上供一時岷
峩安堵既爲蜀請旦夕之命且爲蜀建萬世之
功茲役也以回天造以鞏地靈鴻德也膏潤羣
生樹聲永世大烈也榮光吐曜川瀆澄泓至祥
也襲休禔福垂播來茲惠洽徃初恩肥土域昔
海隄築而民以范字子蜀寇寧而文定肖像人
情怙戴不足乃有咏歌齒牙有窮爰謀金石公

視民饑民溺不啻痼瘵在寧方寓有古大臣風
節其在蜀功未易婁指當與江流具無極也繫
以辭曰 江湯湯兮激潏潏隄防圯兮堙爾源
灑沈蓄兮湛新恩周渥澤兮協網緼建玄鉞兮
駉馬馳公之來兮茂前規屹金湯兮耜趾時桑
麻荼兮禾黍滋又曰江一石兮泥數斗糞且溉
兮終南畝食我民兮家萬口忘 帝力于何有
開天門兮繹膚公式歌舞兮代鼓鐘淵泉溥兮
膏惠通歷千禩兮明德崇史作頌兮穆清風

華亭徐氏義田記

蓋嘉靖癸丑先叅知爲徐文貞公禎薪士比余
入中秘而得從公之孫蓋夫游甚相歡也別去
數年余捧諭歸蜀報事還闕而蓋夫至都
門一再過從曰吾幸藉王父餘澤以無虞於饘
粥然舉族千指不能無困窮吾不敢私先人食
而此盈彼詘也記先尚璽公易簣時惟助學贍
族爲念既免服則捐田百畝爲義莊俾老弱不
任耕者取食寒不任衣者取衣焉將世世延之

王康山房 卷之四 七
世世賴之庶幾比于敬宗收族之義子爲我記
之余聞周禮以本俗六安萬民蓋三代盛時授
業有常至聯兄弟同衣服上不忘一體之親下
不失群居之懿程氏曰宗法壞則朝廷無世臣
又曰欲行宗法當自世臣始今世之躋魏膾食
大官甚至脫越瘠以益秦肥結客市交高會倡
樂不辭千金何可勝原出門視窶人子不一改
容子姓昆弟勃蹊諍語相靡以薄相馳以競宗
祏有靈亦何辭於九地顧不辱其先與安在其

恢廓箕裘昭融閎闕以弘締造耶天道猶酌
彼注此既以與人已愈有既以分人已愈多君
子謂蓋夫善成先德也度越於末世遠矣維時
帝澤淪濡休光下逮象賢繩武周禎商士並
遜前徽要以開創拮据肇無窮而垂不拔文貞
公與司寇尚璽之功烈矣若夫刑仁講義諷世
勸俗以澤則九里之潤無不覃也以世則百葉
之廣無不聯也以義則啓後承前無不洽也茲
舉也固繼述之思而昌後之券哉昔韋氏述祖


王堯山房 卷之四
德以訓其子孫俾後人毋忘創造之艱希文宗
盟至今著義無窮乃蓋夫昭前之令德務收族
爲事可謂知所重矣徐氏之子若孫緣此以動
作求之念而海內聞之者感發興起篤於懿親
近而家遠而天下和氣薰蒸戶成可封徐氏之
慶亦引之勿替宗法自世臣始驗矣驗矣此何
論韋范二氏哉貽厥孫謀以燕翼子余有感於
文貞公之善貽也故不辭爲之記

平越府脩城碑記

皇帝神武獨運薄海內外悉庭悉臣諸凡揚波
伏莽之屬各就殄夷蠢茲播入介其鴛鴦憑阻
作孽邊吏以聞 皇靈用昭揅伐大舉于時督
撫諸臣咸奉 明詔往聲厥罪青螺先生郭公
以御史中丞持節鉞趣發黔中諸將兵入則紆
籌帷幄出則率先戎行三軍雷厲人百其競旌
麾所指折醜如遺數載逋誅一朝蕩定會直指
畢公至乃謀爲善後計疏奏之則以王者制馭

險捍蜂於未螫戒初于未濟莫如城平越便順
則撫逆則誅一夫登陴千里葆塞 上悉當中
丞議乃下其事於監司某知府某同知楊可陶
規度所爲雉堞者若干而羸其崇若干丈而羸
週遭爲丈若干而羸爲麗譙者爲津關者爲戍
廬者廨舍者工始於某年某月九越月告成事
崇墉言言控扼樞會文武吏士忭蹈鼓舞以爲
有更生之賜可陶則以書抵都門不穀幸在中
丞任使身版築之責茲伐也 廟堂所照臨也

中丞直指所決策也二三寮案所戮力也可陶
藉寵靈得以褒衣博帶當一隅且謂郭先生曩
在蜀余爲標薪士請余紀其事余故憶詩周有
四夷諸侯之難其城朔也以南仲 城東方也
以仲山甫皆錡鏗炳耀光輝千古兵志曰上兵
伐謀又曰善師者不戰二臣念之熟矣至於感
時序於雨雪思每懷之靡及外伸敵愾之威內
念付托之重上副一人眷注之情下慰寮友寅
恭之望蒿日相語則其名之赫赫功之明明信



原件短缺

非偶也茲役也弭不逞銷未萌百世利也若夫
功實之偉載在勲府余不敏其何言中丞江西
秦和人直指某人先後與有勞績者某某揚君
將以余文鏤之城隅以示來禩余乃系以詞曰
皇者其武威加六幕靡不來王東倭伏辜北虜
納賚罔用不康獷彼逋臣獨曠而睥獸逝鳥翔
負嵎猛噬狂奔叫呶跋扈陸梁 皇心庭炷卿
材簡在金節煌煌爰顛爰禡文武大吏孔棘不
遑乃胥戮力以迄天誅賊鼓彭彭中丞稽首志

遏亂畧休命對揚訓于虎旅拳勇來格兵不留
行三軍一呼兔窮穴披京觀相望既殲其魁于
羸于備不刃俱降飲至於廟頒賞於朝凱歌洋
洋臣曰罔休 帝曰勞止荅此非常維茲平越
維播咽喉襟帶一方踐嶺因山築之登登相厥
陰陽七旬有苗三年式伐維昔虞商 皇耀其
烈罷肩滇戶固存推亡武媿七年守在四夷于
夷于襄撫爾黔黎樂而室家原野穰穰偉哉奕
奕乎經斯營斯勞臣之寇黎蛾有銘揭之千禩

三峽山房
卷之四
三
怵彼憬荒

大峩山永明華藏寺新建銅殿記

太上在宥六合嘉與斯世共臻極樂遣沙門福
登齋 聖母所頒龍藏至鷄足山登公既竣事
還禮峩眉鐵瓦殿猛風倏作棟宇若撼因自念
塵世功德土石木鐵若勝若劣若非勝若非劣
外飾炫耀內體弗堅有催剝相未表殊利惟金
三品銅爲重寶瞻彼玉毫敞以金地中坐大士
天人瞻仰眷屬圍繞樓閣臺觀水樹花鳥七寶
嚴飾罔不具足不越咫尺便見西方以此功德

迴施一切衆生從見在身盡未來際皆得親近
供養一切諸佛菩薩共登無上菩提既歷十年
所願力有加瀋藩聞登公是願乃捐金拮据經
始爲國祝釐會大司馬王公節鎮來蜀念蜀
當兵侵後藉此法潤洗盪陰氛捐餼以助其經
費已中使銜命宣慈旨賜尚方金錢置葺
焚脩常住若干命方僧端潔者主之庀工於萬
曆壬寅春成於癸卯秋還報王額其寺曰求明
華藏云遐邇之人來游來瞻歎未曾有登公謁

予九峯山中俾爲之記惟我如來弘開度門法
華會中廣施方便檀相薨雲遍周沙界竹林布
地上等色天所以使人見像起信故信爲功德
之母萬善所繇生也法界有情種種顛倒執妄
爲真隨因成果墮入諸趣當知空爲本性性中
本空真常不滅六塵緣影互相磨盪如金在鎔
爐冶煎灼非金之性舍彼鎔金求金之性了不
可得十方利土皆吾法身一切種智或淨或染
有情無情皆吾法性大覺聖人起哀憐心廣說

三乘惟寂智用渾之爲一然非因像生信因信
生悟欲求解脫若濟河無筏無有是處故密義
內熏莊嚴外度爰闢廟塔以爲瞻禮馨潔香花
以爲供養財法並施以破貪執皆以使人革妄
歸真了達本體而已正偏知覺善思念之登公
號妙峯力脩梵行智用高爽山西蒲州壽固寺
僧也乃系以贊曰

世尊大慈父利益於衆生功德所建立種種諸
方便後代踵遐軌嚴飾日益勝如來說諸相皆
是虛妄作云何大蘭若福徧一切處微塵刹土
中塵塵皆是佛衆生正昏迷深夜行大澤覲面
不覺佛冥冥罔所覩忽遇紅日輪赫然出東方
三千與大千萬象俱悉照亦如陽春至百昌盡
發生本自含萌芽曰法而既潤亦如母憶子形
神兩相通瞻彼慈憫相酌我甘露乳唯知佛願
弘聖允盡融攝熒熒白毫相出現光明山帝網
日繽紛寶珠仍絢爛欄盾互周匝扃戶各洞啓
天龍諸金剛擁護於後先既非圖繪力亦非土

木功於一彈指間樓閣聳霄漢星斗爲珠絡日月成戶牖即遇阿僧劫此殿嘗不壞願我大地人稽首咸三依覽一心目了見殿因見性若此加精進了無能見者佛法難度量讚歎亦成妄諸妙樓觀間各有無量光各脩普賢行慎勿作輕棄我今稽首禮紀此銅殿碑佛佛爲證盟同歸智淨海

誥封袁母谷太宜人詞堂記

余讀詩至商頌廟祭諸篇詳哉其眈且至也蓋於賚思成顧蒸嘗荷百祿墮回於員景維河松栢旅楹而歸之有娥之長發若以爲先祐之所鍾乃知故國世家夾保宗祏積厚流光精誠仁孝幽明感通定於呼吸是豈虛窾而無稽哉記曰自仁率親自義率祖所從來姚遠矣元靜袁公母宜人柳東鄉隱君子谷公女也生而端靜仁愛負志操有貴徵舉止不作常態既笄太公

以六禮得請攻苦辛勤黽勉朝夕供七箸務得
舅姑驩心追從太公宦游四方治壺以內惟謹
太公之惠澤哀矜銘祝於江州滇粵間天下莫
不賢之而尤賢太公之有宜人也太公解組家
指日繁宜人毋改故操益攻苦辛勤鷄初鳴珮
環璆然督僮僕受事嫻睦好施九姻多所全活
公以名進士守嘉哀然循良異等綸書褒錫焜
耀里門天下莫不延頸企踵望公以爲以異日
月之際爛焉戶施而尤本於宜人食而愛教

而勞也計宜人之慈儀內則蔭澤百世而胥祉
完禧極人倫之盛詩書以來未有以尚焉搢紳
遠邇邈其家德爭侈艷之爲之贊誄紀傳纍纍
數千萬言其葬處在柳之王相嶺龍從蛇蜒若
起若伏若闔若闢周若垣墉塽若城府形家以
謂陰陽之會神靈之都山下有祠厥枕維岡割
燥就濕檜栢翦鬱烟雲靚深春禴秋嘗神所憑
依是祝而將是濟而蹌馨香條達以理嘉薦悽
愴怵惕以介景福規制備矣無念爾祖聿脩厥

德袁氏之子若孫歲時伏臘啓膏膂秉鬱鬱而
有事于楹坳之間也仰而眺俯而歎息莫不紫
歛嗚咽相與思其音容笑語紹前之烈加以光
明固有待焉若夫覩禾識稼從穗知本天之報
宜人不必于其身親見之仲氏勃興伯季代起
宜人于是乎不朽君子有穀詒厥來裔吾重有
感於公之善詒也乃爲之記系以詩曰閔宇神
臯邃清而嚴堂如斧如几幄瞻瞻籩甒在堂蕭
管在室薦俎登鉶畢陳芬苾子孫承承執爵而

升恭若獻享以灌以興神之聽之錫之休祉翼
翼齊虔頰循軒祀踐霜濡露無永不懷亭亭丘
木哀與榮偕譽命自天賁於孤首式昭媛則貽
爾昌阜圖徽鼎呂托之素旃我勒貞珉億萬斯
年

漢嘉守袁侯去思碑

仔肩袁公以名進士出守嘉者六禩 召拜司
馬郎於是嘉人士攀號遮留填溢街市不忍公
去去而鬱陶頌歎相與伐石肖像構遺愛堂歲
時鞠脃祠下爲祝諸縉紳業已碑其事會余澣
沐還里則聚族造余問公起居狀日來立朝丰
采何若京邸居第何在則又大喜轉相告語以
自慰籍曩者我民不天賴公爲天民未知作污
萊不蠲場功不登公宵旦脩封疆省耕歛不悞

胼胝以問民菑於是穠藜雜施嗷嗷者不至望
屋而嘆公實衣食我敢不德公民未知學公以
所爲藝程諸儒生第其甲乙厲三物而興之學
宮且圯廢捐錘撤而新之絃誦寢得比齊魯公
實教訓我敢不德公民多囂訟則保其衷申其
辟以警無良民多些窳則先拊循後鞭朴以弘
康迪中官煽虐民困征權公寬鹽茶之稅以收
民心於既散勞來安集歌鴻鴈還舊業者驩呼
更生公實衽席卵翼我敢不德公君恒指某政

某法此公昔所張設也某利某害此公昔所罷
行也庶其異公大庸澤天下而溉其餘波惟是
往事礮石以待史氏言則皆撫然相顧語纒纒
不休夫君子出治入長所爲究澤親民而行其
志此難以聲音笑貌爲也里父之愛子不能終
身襁負之乃其德罔極無日不在子子之承顏
堂序交相煦愉不覺爲驩迨其去親日遠天涯
羈旅未有不寢而呼寤而悵然念者陟屺則思
望雲則思人從故鄉來它無暇詢先詢父母眠

食何似起處游息無恙其情自膠結不可解鄙人何知饗其利爲有德公煦育吾民不異慈父母愛嬰兒去嘉之日壹如至嘉之日既去而民歌利之甚於方至而民怙賴之詩曰樂只君子德音是茂觀於一郡而天下可理也 天子方獨運神明經緯西京名實之業公身在職方提衡九塞繇茲武卿相繪雲臺圖麟閣功名當益顯於治郡時而遺像在嘉維昔我民飲化如春以瞻以儀以薦泚蘋錦水清波峩眉峻極入海際天皆公明德余聞父老言低回祠下者久之乃執簡而申之

重修崇玄宮猶龍殿碑記

萬曆丁未余以使事過涿襄徧於軒后之舊封
慨然慕崆峒順風之跡考議古昔咸言城東北
隅有崇玄宮宮有二殿前奉三清後奉老子榜
曰猶龍當晴霞朝絢夕霧橫山心遠地偏堂廡
突兀五雲中疑有仙聖往來其間元泰定中鍊
師岳張二真人棲息於此吳草廬先生為之記
疊疊數千言二真人道業攻苦利物度人孜孜
弗懈而壹稟於孝弟禮愛其旨益深遠矣蓋茲

觀初立綿歷歲時神明所馭上接虹霓鸞鶴攸
潛下交星兩仙真趾美德音不遐世易時移馴
致凋落荒榛弗除茂草斯鞠遺功墜緒若有待
而興也者道官王業尚冲玄匠智規心將爲
經營之基謀之柳泉張君君樂善敦誼好行其
德覩此勝因乃捐淨貲支壞補缺壘隕覆漏歛
自莽蕪覆爲金繩其徒某嗣厥先猷沿故鼎新
時則景仰者聞風助道者効力重開日月之庭
大啓元明之相每至三辰法會八景真游雕楹

畫拱磊砢相扶方井靈圖參差交映尊容肅穆
神館虛閑遠邇縱觀萬目同聳不必瞻紫氣于
函關望青牛於玉局而五城韜海香生栢葉之
鑪八洞藏雲影入芙蓉之座矣動玄機於眇蠻
昭象迹於氤氲厥功顧不偉哉張君俾余爲記
余聞道家者流欲人脩然玄覽冥合太虛盪意
平心同脩短之域而無怵惕於胸中以至上下
星辰呼吸陰陽超三光而獨存當有不依形而
立者乃擅施爲六度萬行之一積善餘慶捷於

桴鼓茲殿久廢之餘易以新堅川媚山輝靈龢
萃止神之聽之介以景福又何疑焉故樂其成
載筆書之以附於草廬先生之後異日刊落塵
縛長嘯五嶽三山因以券采真之游焉

賦類

哀貞賦 有序

余友張德符太史爲余譚節婦連氏之烈也蓋
侈栢舟而媿黃鵠云氏同鄉少高公女也其詳
載在蔡弘甫太史所爲傳嗚呼死生之事亦大
矣青天不語白日方馳悲引義於三良吊求仁
於二子傷哉柔靜婉孌之姿乃能明暢大義趣
死如歸弘甫謂周南首化尚禮義重名節多賢
婦人此其樞芳競峻巖巖孤絕即烈士尤難哉

是風也乃哀而賦之 節彼神嵩之峻兮含
靈氣於元漢兼望羲而吐納兮貞兆數而磅礴
川潛孕乎龍光兮山鳳停而綿廓乾坤氤氳而
中泰兮嘉祥徽顯而豫作彼名竒之茂行兮固
衆芳之所在也並毓秀於閨闈兮符內則於蕙
蒞也繫德族之玄胄兮矯河洛而炳靈也懿光
烈於鴻漸兮表羽儀於上京也羗淑女之嚮若
兮凜凜冽之異姿被明月以爲裳兮珮寶璐而
陸離爰奉嬪於君子兮期適當乎泮水奕慶雲

之光覆兮惟蘋藻之克承佐繼畧於寒燈兮甘
操杼而未怠遵義方之隆訓兮憲彤史之典戒
何命數之竒薄兮遘天禍之未悔悵良人之奄
切兮顧形影而心瘳靜闔戶以窮居兮情嗚嗚
而失聲伴冷月與悲風兮覽巾箴而泫泫淚橫
迸霑衣兮心瞽亂而怔忡撫衾幃而歎息兮傷
如綴之餘生時曖曖兮向昏日杳杳兮西遊謝
鉛華兮不御堅夜臺兮永誓憂絳結其誰控兮
容貌儻而頓敝鸞晝舞而自閒兮鶴宵飛而孤

唳命阿保而就慰兮涕簌簌而難勝也若敖餒
而誰矜兮情惻惻而撫膺也退幽悲於堂隅兮
神邈緬而屢升也病存亡之殊制兮猶依依其
附憑也曜靈曄而遄邁兮木葉脫而墮雪腸復
斷於九迴兮貞並顯於百折惜盛年兮幾何捐
淑軀兮引決甘絕粒兮早殉左右淒兮相咽白
日黯而失光兮精皎皎而容與也悲夫蕙華之
層敷兮紉綺旒而菴翳也夜光銷鑠而滅毀兮
棄精氣於六虛也建日月以爲蓋兮駕太乙之

象輿也與英皇而遨遊兮載玉女於後車也媿
共操而爲烈兮同陶女之芳譽也重曰惟玄黃
之判剖播厥性於柔剛肇馮翼而惟象揭彛教
於人綱彼幽貞兮殉節譬忠賢兮矢良既委質
而致身即蒙難而貞常身與鴻毛等輕名與泰
山久長方世俗之幽昏江河逝而無梁攀芙蓉
於木末采薜荔於籩筐播江籬與滋菊繫申椒
而爲糧已矣哉惟貞魂之灑渺兮與婺星而錯
置兮華質長存叅天地兮乘間維而反顧中皎

三
卷之四
潔而湛粹兮自古皆有死獨凌泰初而無媿兮

旌義賦

有序

昔司馬子長稱魯朱義至高以彼雲棲木食風
烈罔見然而德音質行千里誦義斯巖處之竒
行乎其砥志修名亦偉矣余自束髮雅知李心
湖翁亮節清風海宇嶽嶽萬曆己亥余客長安
邸舍與翁隣得讀其祖李長者旌義賜爵諸傳
志嘆曰觀禾知稼從穗知本世德固有開哉暇
因抽毫以附昔人高山之仰而作賦焉詞雖俚
陋聊寄懷於曩哲爾

唯達人之間覽兮握貞德以爲符慨品庶之馮
生兮炳元化之靈樞彼貪夫之殉利兮竟殞志
於泥塗嗟重積而能散兮誠睿士之所謨孰敦
惠之非寶兮孰攘攘而非愚吾悲夫貞風既凋
兮碩人之云逝襲明德於微懿兮乃獨眷此嘉
族維龍首之誕神兮凝三五以降育湧珊瑚於
閩海兮編蘅芷以爲服鏡洪濛之宇宙兮光有
蔽而愈赫法老氏之守黑兮固獨遠於矰弋撫
長鋏以周章兮豈世俗之所疋荃既有此內美

兮乃蜷局於空谷抱淳樸以爲範兮蔚畎畝之
光實晞髮於五華兮濯足於滄溟匪仁里之弗
宅兮匪義跡之弗行伊中情之信修兮慕萬石
之遺馨旌性行於制佩兮鑲夜光之熒熒舉世
競進兮荃獨甘泉石之徜徉舉世厚歲兮荃獨
懼多財之媒殃兄董賈而弟荆劓兮被禮誼之
繡裳豈立枯以爲隱兮豈附榮而爲彰淨名之
第一兮寤妙德於前三析三車之遐軌兮閱十
行之梯詮鋪金地於祇林兮聚恒沙於福田綺

三
卷之四
三
紺映於堯率兮寶砌兀而孤騫彼洪波之泱泱
兮人方苦於涉揭乃伐石而爲梁兮長虹續其
飲渴物寧憂乎濡尾兮壓洪流而砥塞篋既無
積帛兮廩不餘累重然諾於片言兮賓客紛以
待火月旦虛禮兮州壤推風爵胡僅於下士兮
祿等上農 譽命斯煌兮非夫子之所快也義
必懷邦兮豈抱關之爲隘也何萑苻之嘯聚兮
乃我疆之爲戾也奮吾鋌以除莠兮懇嘉禾之
是億也覽先民之巨程兮謂積善乃餘慶故吉

人之嫖修兮諒介福之保定羗潛德之淳備兮
固神明之所聽爰申佑於後哲兮宜戩穀之有
命乘青雲以翱翔兮齊王馱於廣路揚御月之
清芬兮振千古之高步矢孤忠而排閭闔兮冀
旒旛之一悟吾道倚以朱絃兮曰麟鳳之馳騫
何中情之好脩兮猶孤憤於積薪獨脩然其容
與兮甘介石以守貞既滋蘭以九畹兮又樹蕙
之百畝唯昭質之無虧兮雖顛頷之何悔余命
靈氛而卜之兮曰兩美之必合朝發軔於咸池

王齋山房
卷之四
三
兮夕將遊於天極名世軼才兮毋寧天授植義
肇祥兮祖澤維茂于叟高間兮後且大以駟馬
實氏好施兮留胤賢之純嘏永清芬於祖烈兮
曰懿德與榮名苟耕耘之有獲兮知我粒之已
成亂曰夫人之義余所思兮如金如玉永爲儀
兮仰高山而太息兮蘭芷芬其未沫心慙慙而
何斃兮

樂府

古歌謠

黃澤辭

黃之淙其馬三駿皇人混同黃之滴其馬九逸
皇人得一

南山歌

白石粲明星稀鳴鞭驅犢南山歸愁來夜遲空
攬衣神農已沒唐虞非黃犍玄特何時肥
越人歌

今日何日兮理權清漪揚柁陳瑟兮得與王子
相隨朝發桂渚兮暮入蘭浦意娉婷而自惜兮
儻徇江滸洞蕭咽兮聲參差心欲君兮君不知
自君之出矣

自君之出矣不復一還顧思君如蚕絲語向肝
腸吐

鼓吹鏡歌

聖人出

聖人出協靈符握金鏡整天衢治穆穆德皇皇

上職要下職詳投珠抵璧潤八荒晻曖寒谷熙
春陽熙春陽錫繁祉弘啓佑綏孫子

日重光行

日重光乘六螭升天門日重光天姥手浴出溫
源日重光霓旌絳節色紛緼三山離離若木繁
潛魚躍波谷鳥掀野人出作爭負暄十華燁燁
垂其根

月重輪行

結隣黃文穆穆金波厥御者何望舒織阿三日

成魄八日成光興福降祥虞帝重華協德陰陽
王者不私景星出而助之兔藥搗長生令我主
千萬期

艾如張

艾而張羅霜零草枯中有萬族相驚呼畏逢彈
射傷其軀聖人施三面之仁禽獸全其真囿有
鸞鷲郊有麟艾而張羅慎勿割鮮以焯輪

上之回

上之回班陸離天馬來白麟上之回坐明堂

天欣欣地穰穰上之回至石關廣樂張頰大秦
至越裳發號施令采時順方鴻漸其翼燮寧殊
邦孔淑不廷景命宅而未央

戰城南

戰城南逐城北長虹貫日日無色拔劍上馬沙
沒馬腓北風瑟瑟來厲馬突重圍名在壯士籍
性命安可辭駑馬飽以騰騏驎夾路悲河無梁
洪波湧起念之斷我腸思子良臣良臣誠可思
捐軀死難飼鳶鵂

君馬黃

君馬黃臣馬蒼白玉爲羈絲作韁攬轡相隨懷
路長朝遊閬風之巔暮秣瀟湘之汜人生棄舊
愛君心寧久恃長夜忘歸來向風嘆息獨徘徊

臨高臺

臨高臺以鬼下有松栢何離離珊瑚石上栽女
蘿黃鵠獨宿空山阿山中十月多禾黍一半輸
官一半汝禾黍日稀關弓問鵠將疇依

朱鷺

朱鷺鷓且止旄嫫敷飲丹水跋烏爲爾友長鷺
爲爾媒籥浮雲閭闔開烈騰八荒朱鷺來

擁離

擁離趾中可築房辛夷爲楣挂爲牕擁離趾中

上陵

上陵何芻蕘下津遨以遊客從何方來江水春
悠悠青龍駕我驂白鵠翼我舟紫鳳來參差玄
鵠鳴其洲芝房石室乘崑崙虹蜺爲旆雲爲旂
乍開乍合不知塵土喧瑤宮星辰布雕軒有在

三聲山房
卷之四
三
難望目倦道路濶念此心徬徨蟬鳴高樹顛零
露霑衣裳感激生憂思緬邈蕙蘭芳悠悠懷所
歡河廣川無梁閑宵撫鳴琴繁聲雜官商山中
多挂樹離隔徒心傷

登薊丘憶樂生

五言古閣試

雄圖已消歇高丘來悲風立馬蹇延佇忼慨思
遺功樂生何磊落燕昭相邁逢雪耻恢前烈勇
略震齊東一朝信讒間烏在藏良弓尺書奉嗣
君凜凜懷孤忠易水寒不流悵矣生餘恫

招隱

五言古閣試

秋菊有佳色谷蘭多幽芳逍遙步林園嘉木
叢篁中有冥棲人鳴絃撫清商礪齒嗽玉泉振
衣陟層岡清風吹我襟黃鵠遠飛翔放神六合
表舒卷任徜徉長揖謝徽纆鷗鳥自相忘纓冕
苟難羈吾樂在滄浪

送顧悅庵叅知滇藩有引

悅庵顧先生爲蜀治兵使者五襁威德旁暢
翔翔乎穆春風而暄玉燭天子長城隱然

三
卷之四
三
邛都蒙嶺間茲膺 新命持節移填南中雲
樹江山皆有行色士民攀卧而黯然知不可
留矣余結茅江海混跡漁樵蚓食蟬飲比於
木石邇者千觴傳北海之尊雙屐捫高標之
月卸斤委矚葑菲不遺把臂興歌意諧金石
乃今再瞻祭戟千秋知己離晤靡時繾綣之
懷岐途增劇於是作詩八章以觴御人才慚
巴里終貽行李之羞情附高山敬託河梁之
贈固未計工拙也

歲晏寒風肅野草露零霜冉冉孤生蓬長隨迅
飈揚人生非繫匏離索誰能忘陽春昔何來使
我發輝光燁如蕙蘭敷鳴若宮與商羽翼臨當
分惋嘆結肝腸

肝腸結朝夕四牡悵明發鷄鳴起待曙城門見
殘月柝酒指河梁青旌導前鉞結交豈無因聚
散成倏忽忼慨還自憐相視改玄髮聲似含風
蟬沉吟忍中歇

中歇道路長別君良獨難執君羅裳袖送君錦

水湍嗟予凡卉資蔭此雙琅玕風雅不可作大
道揔狂瀾予也思徃哲撫膺生憂歎君獨騁高
步凌厲生風翰黃鵠摩蒼天杳在青雲端
雲端有佳彥伊人良可思娟娟瓊玖姿粲粲白
雲辭天風吹斷雁乃在蒼山湄 聖神握鰲極
萬宇茁華滋金聲昌黼運左右從文螭君爲千
里驥予如峨眉芝形影豈不傷各在天一涯願
言保明德珍重鳴朱絲

朱絲黃金徽急直乃同調絲以寫深衷徽以傳

窈窕疎鍾布涼月河漢垂光耀照見雙白榆雲
葉含孤峭靈曦浴咸池海色生遠眺流覽臨四
垂出門發長嘯安得茵桂枝貽子崑崙崙

崙嶠一何高天閭一何遙嘉樹雜絳霞日月閔
穹霄經綸矢姬畢謨弼追夔陶天老列三台鍾
鼎颺華鑣上荅 明主知下以慰漁樵

漁樵歎予拙閉門春草深草色歲年改知己難
爲心中懷悵有違浮雲垂遠陰時看河上樹樹
有甘棠林馳情脉脉中永言懷德音

德音不遐遺天寒臨遠水幸有場中藿慙慙敘
終始伊昔沐体邁綢繆奉芳軌屢投食桃愛曷
以報之李相逢兩莫逆肺肝託千祀日斜川上
波欲行復暫止南北在須臾結意何能已

連貞婦詩

幽蘭有餘馥貞璧無纖疵黃鵠集椅梧矢死鳴
故枝炳炳連氏女皎皎冰霜姿毓質自德門嫵
婉儻令儀十七嬪華闕蘋藻適所宜鸞禱甫相
結夫子奄乖離驚心眩白日泣淚滿衣帷良願

既難諧殞身安足辭落木黯寒飈依遲起憂違
結恨鍾乃心朱粉不復施黃壚陰且冥絕粒斲
相追

靈芝生河洲倏忽成菴翳淒淒繁霜凝烈烈夕
風厲柰何貞淑姿一朝解仙蛻寒松脆女蘿明
月空庭砌寶燭夜無華蟾光遠虧蔽雁鴻各有
歸川流已長逝玉顏豈不愛人綱固靡細神理
永綿綿灑氣獨無際緬邈首陽人共欽於世世
昔王文成公深得造化持盈之理謂未見千

葉榴結子蓋爲後嗣厓也予誦其言而惕之
後公有子雲仍且盛則知公所培毓者深矣
予旅邸植花木數本今歲千葉榴偶結數實
山荆見之甚喜謂予當益培其德也詩以紀
之

佳候值朱明薰風滿齋閣策杖步園中榴花開
灼灼靜思造化理盈虛遞相錯常恐繁華盛因
之元氣涸桂露花不實霜至百卉落胡爲此榴
者陽春更有脚深根蟠虬龍柔條舞鸞鶴霞葉
方垂艷珠胎遂連萼再誦陽明語觀物聊自紓
祖德固已厚灌溉宜有託鼎鼎百年中栽培在
勤恪孔父有遺言循墻無菲薄

七言古風

月食遇雨

七言長篇

玉盤冷冷光腫臃出來飛掛碧雲中青天絀滑
玻瓈色圓魄皎潔桂枝叢何物狼籍橫天步澄
輝倏忽如頑銅長安士女爭擊鑑仰頭憤惋呼
蒼穹須臾高覺集飛霰飄絲亂滴來溟濛池溜
長流涸復積炎蒸失却火雲紅我聞蠶精恣噉
吞瓊兔躑躅天難通又聞人病在目睫有物遮
翳非外攻豐霽電毋能禦侮應見不見踪跡蒙

太清居處元自穩豈緣愆度虧神功巨靈一挽
西溟水洗出白榆還太空南安赤鳥東蒼龍北
龜不吐陰崖氣西虎不嘯金方風萬古天柱應
長屹編珠連貝欣遭逢

天目山歌壽沈鏡宇先生

代

天目峻嶒高插天下瞰東溟生紫烟晴霞掩映
金銀闕日月雙從峰嶺懸騎羊仙子杖綠玉兩
兩鋤雲耕玉田層岨復澗幾千里星杉瓊樹紛
相連樓臺百尺倚星漢飄飄氤氳走飛電龍湫

百道注茗湖凌澄一塔玻璃散玉露霏微仙掌
來天乳空中相瀝亂扶桑縹緲若木枝千歲桃
花開爛熳主人生居天目東星斗錯落羅胸中
文章蚤之登庸志夙夜長懷捧日忠宇宙勲猷
推領袖亮志清風天下崇結髮事主四十載焚
荷強半在烟叢憶昔當年振洪唱許身直擬夔
龍上清時三禮振竒芬鵠立螭頭神意玉舟起
清卿弼帝謨羽儀六合爭相望龍性從來不
易馴解組一朝還鴈宕誰為汗漫太清遊而公

自有盧敖杖有時枕石卧羲皇
林間泉響鳴絲簧有時翩颺
招舞鶴朋來飲以白鵠漿
有時種秫課石農東籬黃菊
充餼糧有時閉戶披南華
露濕芙蓉冷石床野鹿沙鷗
紛來往安期羨門同相將
昌黎名重紅雲島裴相身閑
綠野堂已看雙鳳翔金闕還
有蒲輪召建章海潤山青渺
何極舞彩吹笙樂未央

壽朱太夫人

鰲簪一柱撐瀛島碧海蒼茫
接穹昊萬年瀨氣

扶鴻濛瑤堤偏種長春草翠
崖丹巒芙蓉峰金銀為闕玉
為宮日出扶桑熙萬象烟霞
欲吐交冲融薰風萬里吹平
陸紫氣氤氳覆華屋鳳凰臺
上錦城堆燕子磯邊水如玉
鳳臺燕水湧蓬萊卿雲五色
繞三台南極西池在何許人
間亦自有丹臺稀齡七十古
稱異紺髮朱顏相映晬阿母
乘鸞天上来素娥玉女紛同
侍霓裳緩舞青鳥鳴滿酌天
漿玉笋平鹿肪麇脯薦珍錯
金泥照耀斑斕輕膝下鸚雛
早通籍九苞奮起丹

三齋山房
卷之四
四十一
山翮午夜書緇太乙藜金甌好覆明光冊 鸞
章玉檢麗星辰板輿花下寵光新同聲共獻南
山曲如日如川受祉頌

蟠桃歌壽張母太夫人華誕

三山崔嵬接蓬海上有貝闕瓊宮在亦有瑤桃
萬樹花一開一實幾千載瓊宮琪樹靄春風鰲
簪屹立撐鴻濛六龍浴彩出朝日九寰俯眎空
塵蒙福地紆迴靈灑萃自非飛仙不可至十二
雕欄白玉樓三千法界黃金地東方小兒豈不

良朝遊弱水暮扶桑三過桃林採其實擎來漢
殿生天香天香灑殿舒莫早報道年年春色好
春去春來歲幾周青松白石應難老何須海外
問丹瀛壽母今傳魯頌聲瑣闥 天題新誥錫
斑斕人羨世簪纓婺星昨夜祥光見法酒琺厨
陳壽宴忠孝恩霑雨露深逍遙一任滄溟變卿
雲五色護瑤池紫烟婀娜披靈芝錦里衣冠紛
獻祝我因猶子亦題詩

題沈母節壽駢榮卷

海上樓臺十二連，葉宮銀闕奕鈞天。
陽烏朝浴扶桑水，龍木春耘種玉田。
種玉田寒石髓瑤草琪花奔，自披星杉寶樹開。
瓊綺西來鶴馭下，赤霄瑤池氣壓吳關紫。
沈家有母垂黃髮，手持綠玉長生記。
天釜誰擗紫麟羹，烏瓜靈娥霏玉齒。
遺孤剖竹天台東，龍劍晴閃桃花紅。
尚方鍾動彈冠日，雙舄翩翩來漢宮。
已聞聲價佩刀重，更羨雄才竹箭同。
芙蓉作花栢作葉，炯炯清光映霜雪。
孤鶻叫天天為悲，三徒和丸形影子福善。
從來未有私青鳥，相將啣紫泥。
壽觴頻酌金莖露，婺彩年年照鳳池。

題鑿士王養心風木卷

零霜夜落江楓樹，上有啼鳥泣秋雨。
愁來空廢蓼莪篇，野曠風寒白日暮。
鏡水時涵月窟珠，丹池曉接天門露。
吊鶴千年去不留，玉棺何處沉仙霧。
乾坤慘淡黯風塵，雪涕無從增孺慕。
寸草春暉詎可酬，憐君罔極懷衷愫。
空江月冷照啼猿，簫瑟清楓走孤兔。
馬鬣重于夜壑輝，新碑倩

得中郎句芝草琅玕白石齋壺中獨得滄浪趣
海雲不斷杏林春年年散作金臺澍塗山秦望
佳氣蟠蟬聯鵲起蜚天路古來良相即良鑒千
秋播德垂光裕箕裘奕葉熾且昌堂下三槐卜
君祚

劉復齋先生崇善祠歌

代

瀛海天風吹曙鍾紅日曉射金芙蓉平沙浩蕩
闕星斗彩雲近接蓬萊峰台光夜照青藜閣石
室瓊牕紛綺錯檻外常留太古雲爐中不斷長

生藥東來紫氣滿關門西窺瑤圃傳青雀曾言
鰲背駕三山又見安期控黃鶴先生峩峩嶽誕
神經濟文章今甫申扶日擎天堪報主結茅構
屋且娛親分得 賜金來講幄自斟甘露禮玄
真清都絳節朝龍輦妙相黃金擁瑞輪四月薰
風吹浦口座上金尊注春酒玉甕千巡琥珀傾
雕盤十二銀絲剖我來獻履及芳時彩燕晴簾
拂疎柳先生示我祈年篇明月纍纍盈素手我
聞文昌駐景在飛霞乞靈忽向端明家又聞大

士深居補洛山徐卿抱送來麟車積善公侯生
滾滾神機瑞應當無差五壘城邊氣色開華封
有願歌金壘漫云綠野堅龍卧會有丹書 帝
手裁

觀東征將士入關歌 七言古館課

大將宣威東被戎捷書飛報五明宮一夜攬搶
齊墮海萬方玉帛共來同雲屯虎旅橫戈壯寒
光耀日旌旗盪組練稜稜殺氣攢雕鞍笑擁黃
金帳材官意氣逼長虹此日天山早掛弓車塵

踏破三韓月雷電朝生叱咤風神嵩山下民歌
舞雪耻除兗報千古生得名王面縛歸金湯世
世咸安堵名績須知銅柱標功成絕勝霍嫫姚
天王有道關仍閉坐使狼烟靜裏消

儒林務學歌 館課

藝館逶迤接上台玉堤金水繞蓬萊雲連珠斗
秋光入日射銅螭曙色開象緯天高華盖逼樓
臺十二凌姑射冠盖雍容集勝遊紫莖湛露飛
瓊液文窓綺閣散芸編萬古詩書一榻懸香捲

九霄紅玉篆清依太乙水晶蓮慙予蓬質遭榮
 遇瀛島希光隨景驚玄霄沆瀣飲三山婆娑未
 諳經世務孔鑄于今覩步趨駑駘十駕追先驅
 秘署熒熒照藜杖沉酣載籍味真腴君不見宋
 家名勛稱焯燁陳編兀兀無停拾半部論語致
 太平風流百代推調燮

讀留壤遺芳卷漫述

有序

余讀同羊友給諫張啓之留壤遺芳卷憬然
 懷高山之思第考通志謂 國初郡守陳公

謙以郡屬重慶奏改直隸興學校重農業率
 於官民祠祀之而不言自沉事若劉君之義
 煙滅無聞因歎曩時載筆者之疎也此卷裨
 世教不淺矣李獻吉云從來泪沒士特筆在
 詞臣余尤有感其言劉明經謁余長安位中
 席間對客抽毫賦之意在闡潛德不計工拙
 耳

扁舟夜向江陽泊沙頭漁艇炊烟薄父老細說
 留壤事請為窮蒼話苦樂 高皇揮戈造草昧

封界煩簡異摹略金湯千里錯如繡 聖子神
孫慎改作職貢衣冠萬國朝華夷盡奉 天王
約烈哉賢守擲一死身似鴻毛委巨壑悲絃夜
鼓湘靈怨哀夢不返孤臣魄全盛以來漸多事
變法輕把疆圖斫玉田山人湖海士虬髯偉幹
乾坤裏隻屐曾穿五岳雲雙龍倒掛銀河水上
書帝闕今幾春散却黃金不計貧女媧青天猶
未改羲和日馭重迴輪何物明經丈夫子詞藻
登壇稱席視琅玕照人七尺軀琬琰藏胸五車

史傳家義氣至今存忼慨陳章再叩閣白日慘
黯風雲起片語春色來江門準我先生廊廟珍
待詔金馬志嶙峋手把琳琅傳往事力挽江河
章隱淪予也潦倒山林骨筆札何敢湮先民况
是維素意不薄錦水風烟通一津與君邂逅何
草草杯前醉舞菊花新君去山中歌白石父子
英聲光竹帛落日啼殘上苑鶯曉來西望峨眉
峴

五言律

題登瀛圖

館課

海上風濤急三山地轉賒人疑生羽翰官欲帶
煙霞謀斷需王佐文章煥國華丹青留勝蹟千
古足榮誇

贈李春卿季丈持節九江

翹首潯陽雁停停憶所知浮雲春不定樽酒漫
相思冠冕瞻天近星辰擁傳隨獨憐明月至朱
瑟為君期

讀燈公淨土偈和傳金沙韻

塵想皆如幻玄言自得師金繩寒欲網寶筏啓
靈知妙辨傳燈遠雕譚刻漏遲還聞傳大士悟
道喜同時

朝發錦官

一飯仍難報支離短翮存慚將鷗鳥性再沐玉
堂恩文豈相如似時應漢主論驅馳何日止作
客媿乾坤

贈青神姚明府

百里絃歌化千秋大雅才錦江飛鳥下玉壘客
星來澤雉依人雒棠花傍郭開政成應獻最聲
彩動三台

金沙寺訪雲巖山人

掃石頻移榻翛然雲水深一燈醒幻影孤磬落
秋林自愧塵中侶今依靜者心夷猶話終日密
樹引潮音

送張澤臞年丈 冊封 襄藩

紫陌薰風細青霄玉節行荆山餘寶氣漢水見

珠明木遠江天鴈花催楚岸鶯平生膠膝意折柳更含情

日月天門迥星辰漢使遙桐珪盟帶礪春殿引旌輶溟漲開鯨力梁詞入鳳韶壯遊仍駟馬驥裹在烟霄

玉署才名重金樽向爾開周親惟魯衛漢賦得鄒枚嶽色遙連蜀江城曉見梅因君望南斗衡霍更崔嵬

為客自難別况此弟兄情芳杜晴堪把浮雲遠倍生月送朱榴色濤窺白雪聲來年鳳池佩春草促王程

寄關中姚生

萬事紛難定風雲氣亦殊人皆驚白璧君自握明珠渭北春陰滿豐城夜劍孤遙知六月息溟起只須臾

送愚庵上人入蜀

時上人奉慈寧宮領賜龍藏安鎮慈雲諸寺

涼雨三秋過江鄉桂子香普門開濃眼覺海引慈航錫掛諸天近杯浮弱水長白雲無去住松

盖日蒼蒼

松蓋用玄奘事

五斗誰元亮三生爾道林
忘機鷗鳥狎聽法鉢
龍吟往事看駒過浮名嘆陸沉
向來聞半偈瓶水悟禪心

雲送蘇門雨天吹玉壘風
乾坤兩足白宇宙萬緣空
鄉緒憐芳草歸心憶轉蓬
峨眉如見月瞻望幾回同

一自羈纓冕為官佞鳥栖
吏情俱道路暇日訪招提
得法依龍樹忘形度虎溪
牟尼珠徑寸頓

破世心迷

寄題胡伯玉環山小隱圖

何處愜幽尋桐陂嘉樹林
緣知朝市隱時有水雲心
花塢留春色松蘿淨晚陰
披圖還繾綣明月滿高岑

露郭平涵樹晴沙曲抱流
地疑習池勝人似武陵游
瑤砌通烟霧雕欄簇斗牛
傳巖深築處行矣濟川舟

賀畢封君雙壽

皇覽揆初度人稱偕老年鳳毛應有種麟趾總
多賢澤並于門慶歌陳魯頌篇蟠桃元共蒂梅
鼎更相鮮

昭代推全盛箕疇五福純慶源元世濟 綸寵
更天申大業標清隱閑情賦采真克賞閑七筵
華祝百年新

鳳曆開新紀春筵讌九霞傳經和夜膽證法指
蓮花有子推邦直徵蘭盡國華青鸞頻報舞仙
飯進胡麻

種玉輝玄圃標霞見赤城竹間珠履集花下彩
衣明日月名堪隱風雲夢已輕大輶來紫氣春
酒酌長庚

寶婺鍾清淑雲霄閎閎崇雙珠呈掌上八座笑
春風豸繡星辰切金莖雨露同長吟吉甫頌鳴
鳳在梧桐

南極騰輝夜西池設悅辰棣華聯寶桂萱色麗
莊椿紫誥彤雲曉黃封湛露新頌歌慙附驥榻
管望芳塵

奉贈傅金沙公祖紀政詩

八首

名世應期

崧嶽千季會英賢上國珍鴻濛窺橐籥洙泗續
經綸古已稱舟楫今仍仰鳳麟幾回瞻北斗此
際更嶙峋

栢臺重望

鳳覽秋梧色龍嘘海際虹蘭臺司袞闕白簡發
充聰澤並鴻鈞力儒開百代宗蓬萊初日上想
像見高風

山斗持衡

舊德朝端重咸稱水鏡才青雲江閣迥紫氣
宗來星逐文章動春隨祭戟開岷峨桃李色雨
露久培栽

巴渝保障

小醜殊猖獗長城歎借君雙旂度巴水萬戶
春雲俗有鳴絃化家傳諭蜀文功成歌吉甫千
載並清芬

轉餉籌邊

三
推轂咨謀重登壇勝笑優軍儲分八道虜膽破
千艘曉旆懸雲棧行營照錦流凱歌來露布殊
錫動宸旒

拊循駿惠

一戰煙塵息岷峨春日遲舞階見干羽不殺本
玉師鑄未銷金甲晞陽摘野葵猶聞哀痛語日
日問瘡痍

播平節鎮

月靜烏江夜天迴玉壘春洗兵還揖讓吹律起

沉淪百雉金湯險重關虎豹陳皇仁自無外
葛大名新

著述大業

授簡陽春在翩翩意不群共傳金擲地真有氣
凌雲大雅驅陶謝微言極典墳憑茲望寥廓天
籟坐中聞

游蓮花池

流水桃花洞琳宮白玉壇桂香雲葉濕荷靚露
華團織女機絲澗鮫人貝闕寒竹房鍾磬晚一

鶴夜深還

香山寺

天高臨斗極
渾與市喧分
巖溜鳴蒼玉
晴峰度白雲
笛吹龍欲醒
茶煮鶴初薰
一宿廬山覺
幽禽徹曙聞

犍為曉發

沈宅時堪哂
蒼茫萬里行
春山江上好
野水樹中生
浦遠寒潮縮
林空凍雨平
醒然吾自恠
短髮滯塵纓

涪州見殿材木筏

數里涪江筏
徵材已十年
人烟愁緒後
城邑淚痕邊
斤斧蠻荒外
惇嫠磬室懸
空餘憂國恨
還望轉淒然

野泊

暮泊投漁浦
風烟望遠津
舟行三峽近
家在五湖貧
嶺樹含殘日
江猿嘯晚春
前林竹影薄
燈火漸相親

江安縣陸明府招飲江閣

傑閣移芳晏煩襟入座清
片帆橫夕照踈雨濕
春城樹濶峨眉晚天高
玉壘平雲中見雙鳥絃
誦有英聲

山中閒適

明月照高樹小坐有餘清
萬里歸來客經年物
外情曠然林水處汎若鷺
鷗輕執戟亦已倦滄
浪聊濯纓

宿雲散遠渚歲晚屬三餘
靜者亦何事樂志在
安厓蘿蔓高連屋松陰半
覆廬青山書一榻自
笑老潛夫

凌雲寺舊時讀書處

偶得魚鳥趣一壺歡相持
臺留蘇氏墨人似習
家池逃俗從吾嬾忘機
任世嗤草玄元自拙嘲
解更多詞

秋晚

近郭澄江霽秋光几席開
長空去鳥外紅樹白
雲隈既醉百情遠浮生
一酒杯半山清嘯發阮
籍故應來

撥悶

蔬食亦常飽，頽忘朝市腥。水流如有意，松老不知齡。峭壁厨煙晚，重林酒氣腥。閑垂棘津釣，無夢到周庭。

重遊烏尤寺

石磴捲寒烟，松深野鶴眠。僧歸江上月，花種鉢中蓮。霞綺春城遠，丹青壯斗懸。生平愛幽興，日暮采芝還。謂有招提好，重来豈厭煩。偶隨高士履，得狎野

鷗馴貝葉翻，經細林花入。酒春翩然振衣袂，何處是鬣塵。

春日郊行訪友

滿郭皆春水，東籬花絮飛。逢君讀書樂，食我釣魚肥。沙燕穿雲入，蓮舟蕩月歸。偶聞樵語響，心賞未相違。

註易洞

有安敬亭先生易象圖

關戶通靈竇，微茫易洞奇。碧雲何處斷，白日此中移。仙草隨書帶，殘碑剥兔絲。長松掛明月，春

老鶴歸遲

洗墨池

東坡先生讀書於此

徑轉諸天近層巒列翠屏當軒收衆岫抵掌落
春星黃鳥鳴高柳青荷覆淺萍因懷昔賢意江
漢炳遺靈

都門早秋

霜月帝城滿風蟬鳴蚤秋鄉心雙鴈足旅况一
羊裘白髮愁難遣青山願未酬却憐霄漢意倉
卒負扁舟

讀鐵簡道人還元集

偃仰成吾拙柴扉盡日關因知塵外役寧似病
中閒種秫調新鶴鋤烟指舊山抽簪慚未蚤惆
悵水雲間

一官

一官薄如水兩鬢蚤成絲吾道空山裏歸休野
性空壯懷消綠酒坐隱任烏皮世事紛難問浮
生豁所期

送仲文世丈奉

使兼壽姚太母暨兩尊

人

方翔辭金馬瑤池奉彩觴筵迎青鳥使杯惹絳
桃香雨露滋萱草雲霄覽鳳皇南山紛獻頌閭
里倍輝光

梁園晴擁傳二室壯行旌冊啓元君錄歌調子
晉笙風雲親舍近日月主恩榮澤以于公遠
名因祖德成

紫陌烟光細庭闌晝日遲報劉寬對酒頌魯細
裁詩家慶光三世承懽并一時德星今聚瑞菜
舞引孫枝

斯文存古道雅語見交盟星出窺龍劍天高聞
鴈聲五湖傾蓋晚萬里御風行珍重匡時略
明廷憶長卿

送如心丈權關滸墅

水鏡方掄士乘輶復遠征天風吹去鴈江月照
行旌問俗吳風舊褰帷漢吏清請看新雨露春
滿闔閭城

矯矯清時彥玄言日起予高風存海嶽重器總

璠璣紫氣臨關日青冥倚劍初征輸慰南國歌
頌美懸魚

輓大宗伯李棠軒先生

落日送千古淒涼罷不朝龍蛇疑有識楚些爲
誰招箕尾精靈邈河山涕淚遙玉華煙雨夕過
客欲魂銷

弱歲探懸圃珠璣映石渠曾從蘇氏里得御李
膺車存亡不重見風儀炯自如傷心草玄處迷
哭更躊躇

岷壘英靈氣春卿禮樂崇寅清咨伯命啓沃
充聰豈意登龍者翻於吊鶴同何緣接神理
斷落絲桐

題高保山四景

水雲深處

勝構開林樾川原乍鬱盤溪光晴亦雨嵐色翠
生寒竹霧行相引芝田秀可餐蓬萊隔塵境佳
氣遶堦蘭

高山仰止

山有年伯肖泉公手記

三齋山房
卷之四
李
景行思前哲憑高縱目初虛堂俯寥廓四壁滿
圖書歎鶴翔遼海遺文動石渠一經韋氏業適
意總吾廬

習靜軒

曲迳攀芳遠層軒向此分巖花栖晚露蘿月暖
春雲白日羲皇意青山綺皓群悠然時隱几香
靄護氤氳

味泉亭

言采山阿秀因諧靜者心江雲飄素練石乳淨

烟林出地為僊醴行天作帝霖赤城霞色
泓下有龍吟

題劉斗隅先生鄉祀冊

宇宙文章伯儒紳禮樂資龍蛇疑有識梁木豈
無思素業丘墳在高名斗嶽垂中郎題句處蕭

颯九原悲

先生墓銘乃黃慎軒學士作

鄉土思前哲英靈想懿模孤標高倚漢佳句遠
探珠忠孝彞常備哀榮俎豆殊宮墻瞻望切束
莫儼生芻

秋日同門諸丈讌集贈別 二首

斗酒燕郊暮高臺北望分上林春獻賦知爾氣
凌雲柝響孤城兩霜寒過鴈群青萍各投贈相
對坐氤氳

日月別何易芳尊千里心亭中慚問字海內幾
知音客計青春晚交情白璧深所期松桂約莫
負歲寒嗟

蜀僧碧巖以卷索詩時余奉使將因便

道還山口占為別

天地萍成跡烟霞性故宜宦途等鷄肋舊業在
峨眉種菊留三徑投竿足一絲焚魚吾有意與
爾白雲期

七言律

宮樹先芳 館試

禁城淑氣迥先滋
漏泄春光滿玉墀
生意忽隨東令轉
晴芳不待曉風吹
雨縈夜色三堦碧
錦綴仙霞十丈垂
折柳未須懷諫草
烟花常護萬年枝

院中 孔廟摘杏分啖之同賦館試

朱實垂垂映廟墻
也從桃李共妍芳
結成白玉堂中果
猶帶鎚林雨後香
明月探丸珠徑寸
醴

三秦山房 卷之四 五
泉繞齒玉爲採食珍鮮識春風力寸草難酬化
育長

禁闕紅藥閣試

名花長染漢宮春香靄繽紛傍 紫宸影拂陛
霞疑作暈色霑風露更生神 君王不隘陽和
澤草木爭分化國仁一自栽培欣得地五雲偏
向日華新

中秋咏月館試

露下金鋪秋色闌秋空忽送桂華看影低烏鵲

當簷度光擁珠胎照夜寒大漠風烟開隴樹千
家砧杵動長安呼嵩不用江心鏡擬賦重輪佐
聖歡

侍闕下觀獻俘恭紀館課

瀚海澄波獻馘歸兩階舞羽坐垂衣龍樓麗日
瞻黃道鳳輦開祥轉翠旂花禦千重鳴鳥入鯤
池萬里片鴻飛小臣擬上敷文頌篤祐於今倍
有輝

送何鼎隅守惠州

馬首風高木葉寒，薊門斗酒斃追誰。
天懸象郡星河動，地引羊城蜃氣蟠。
萬里曉披銅柱月，三洲秋淨紫雲澗。
清時已慶彈冠約，咫尺金莖有露盤。

菊始花館試

灼灼秋英曉露滋，一莖先報上林知。
祇緣正色存天地，遂有煙霜巧護持。
冉冉日精香泛酒，亭亭霞影夜侵墀。
三春桃李開芳盡，遲爾孤操晚更奇。

寄題羅光寓年丈龍騰山房二首

名巒迴合靄清芬，鷲嶺深藏王樹紛。
峭壁夜含星斗氣，石屏曉掛大江雲。
茆堂脩竹芙蓉徑，沙檻寒松薜荔文。
醉倚層臺舒感慨，半天風雨日氤氳。

部外幽臯野色侵，石牀瑤草漫招尋。
乍疑唇氣初成屋，忽道雷門更有林。
霞矗鶯花千嶂曉，雨封莓蘚一溪深。
隆中未許當年卧，濟旱人間正待霖。

送蒯獻五年兄尹曲沃

醉擁驪騾不可扳送君花發鳳城寒卧龍月向
鴻邊度伏陸雲從樹杪看製錦春星高北斗鳴
琴清響散浮山弦歌暇日還相憶好寄雙魚悵
客顏

送王希泉老鄉丈志別

歲晏江關隻雁飛魂銷風雨蹙相依愁心暗逐
孤臣遠短髮空悲萬事非疏動龍鱗天欲撼身
潜豹霧道逾輝綱常不墜須公荷莫謂峨眉老

蕨薇

春日與澤臞年丈講業玉堂漫賦

曾向芳洲憶采蘭風塵爲客共長安多君白雪
能張楚愧我青雲已識韓繞夜雙珠瑩共把凌
霄一劍遠相看可知屈宋元同里祇恐巴人欲
和難

把臂金臺意獨親玄言塵尾坐來頻一天水國
東西色千載蓬山楚蜀人春入紫薇撐露掌堂
開白玉傍鈎陳誰從牛斗占星聚醉倚朱絃調

轉新

送邵芝南太史 冊封 唐藩

帶礪新恩自漢宮翩翩使節靄長虹遙知唐叔
圭重剪不爲梁園賦欲工匹馬秋高嵩少月雙
輜晴引上林鴻輜軒萬里來歸日應有陳詩佐
帝聰

送蓋夫還雲間徐太師之孫

前殿凌雲奏漢皇棄繻季少得終郎家聲御李
吾通籍經術承韋爾擅場去馬春驕亭草碧來
帆晴望海雲翔明年蟾窟傳芬日藜火重于太
乙光

送程虛侗 冊封 魯府便道省覲

天漢迢迢博望槎寧親更喜趨皇華諸侯帶礪
開東海使者星辰護碧紗桃實舊傳青鳥信宮
袍新剪赤城霞歸家若過青羊市琪樹應開百
丈花

送曾致吾年兄使韓府

新恩捧出大明宮第社重開百二雄天上黃河

來若帶日邊紫氣望猶龍嶽蓮秀結孤雲外蜀
鏡晴當返照中取是輜軒勞問俗陳詩何以
民風

送戴鎮樸年兄理餉淮安

司馬閱才動帝京東南竹箭獨高名親從天上
含香吏出領關中轉餉行千里襜帷依桂樹一
尊風雨對蕪城論交海嶽期肝膽龍劍雙看斗
氣橫

送孫太史頒平倭詔赴金陵

漢代長安肇赤符秦淮佳麗壯雄圖天迴曉日
辭三殿筆珥春風賦兩都禹穴秘文金簡在石
頭晴樹瑞烟扶道傍氣色關門遠太史周南使
彩殊

贈何本江

十年曾識斗山名漢寵新承入王京三楚春
雲搖錦紱五陵晴露動金莖甘棠嶽麓陰常滿
寶劍龍文夜自橫聞道得賢應有頌為持寸管
報西清

鳴珂新接五雲班
鳧飛從七澤間
入座雄風高北斗
開尊明月滿西山
縱橫纏壘光華迫
際會夔龍氣色還
醉裏論心歌白雪
旄旌今喜得追扳

送胥澤洲奉使轉餉便道歸蜀

錦官曾擅碧鷄詞
五色文章照鳳池
載筆卿雲寒玉樹
含香省月上雕螭
雙星益部占冠蓋
十衛軍儲給度支
歸日浣花爭負弩
春風車馬動江湄

送黃芳楠太僕

側身南斗見三峨
有客浮槎漢渚過
露下青楓巫峽迥
秋開紫氣大江多
錦濤驟結龍門筆
巴月寒生鐵柱珂
聞道夜郎方報急
枌榆願借魯陽戈

房星天駟映三台
池上夔龍結珮來
日月麟階新賜履
風雲石室舊分臺
彈冠色借岷峨壯
補袞文從黼粉裁
一自層霄翀八翼
鼎樞早晚待羹梅

三秦山房 卷之四 七十
送黃二為年丈

薊門擊筑爲誰雄
羨爾新詩擅國工
天在黔中猶未盡
書成愁後未稱窮
關山故闕懸明月
烽火蠻林度遠鴻
早晚佇承宣室問
莫曰搖落賦秋風

送祁念東督學關中

薊門寒色照清萍
使者衡文出帝廷
冀馬驪黃誰國士
石鯨鱗甲見秋星
河流夜漲崑崙雪
仙掌晴開顛頂靈
不謂鳳聲寥落後
一朝千仞

有儀刑

辛丑還山中

拂衣非是愛青山
祇爲餐霞理病顏
早晚樊籠成獨往
翻嗤塵夢落人間
千章竹樹清秋老
萬頃烟波白晝閑
若問漁樵真樂事
芙蓉江上許同攀

乾坤此日有閑身
山鳥山花總是親
泉石共憐顏髮改
兒童猶識姓名真
雲深綠樹堪馴鶴
風靜清溪獨理綸
但願堯仁歌擊壤
不妨長作採

芝人

壽沈鏡宇代

三朝舊德卓群倫
曳履星辰動紫宸
社稷正殷調燮望
君王無奈乞歸頻
烟霞未老靈椿色
丹藥長扶柱石身
况是韋家經術茂
庭前雙翥鳳毛新

夏日爾華年丈邀飲蓮花菴移席郊外同
高粱二太史賦得青字

急雨初收爽氣清
虛堂迴合枕郊垆
輕陰不散寒塘色
涼葉猶含古木青
坐倚琅玕聞鳳曲
隨穿楊柳見漁汀
清樽未是逃河朔
竒字相邀到草亭

贈王雲泉侍御

蓬萊樓閣錦城東
天挺人龍岳誕崧
地敞蒼螭卿月迥
班聯瑞獸法星崇
平臨王氣開金虎
遠避神奸畏鮑駟
一自當年聞叱馭
直看長劔倚崆峒

寄題沙岩寺和黄平倩韻贈無學上人

三
卷之四
工方香飯煮青泥叢桂深篁不染墜四句能傳
開士鉢三生更隱法王棲雲峰下見龍山比松
霧中分鶴蓋西聞道遠公同白社磬聲今隔鳳
城蹊

贈蕭鶴侶侍御

攬轡中原萬里清行行驄馬獨縱橫人間共識
雲霄彥天上應分太昴精䟽動龍鱗文五彩露
開金掌色雙莖須知曳履推名德石室秋高法
曜明

題張司馬駿烈重光卷

桓桓司馬萬夫雄建鉞當年出海東豈謂揮戈
迴白日翻憐掩袂泣彤弓關山不斷鴟夷泪葵
鼎重書社稷功箕尾身騎何處是蕭蕭山木送
悲風

天地飛塵落日荒英雄雪涕共淒涼劍沉寶匣
秋空紫淚墮金牌戰草黃遂有元功思鉅鹿空
悲遺賦吊三湘祁連高塚藏弓鳥流水殘霞總
斷腸

送梅年丈之成安

春來綠野絢晴霞
純嘏偏宜萬石家
藜火舊傳天祿業
名門今見駟車華
花開錦浦聲猷壯
星聚峨眉氣色遐
莫羨漢宮遺核處
僊郎名姓已籠紗

寄懷元養吾

迢遞關河一雁長
每從龍氣望干將
冰壺夜浸巴陵月
驄馬花飛澤國霜
總為雲霄思驥附
不禁風雨憶年芳
欲知桂樹懷君處
錦水新栽薜

荔裳

贈鄔相士

一卧滄江遠市塵
懶將華髮競青春
德機久向人間杜
幻泡虛慚夢裏身
三徑烟霞秋共老
九峯花鳥日爲隣
相逢莫問封侯骨
蕉鹿原來總未真

題任正川瑞榴

榴於歲暮開五花並蒂成實

嘉樹名花萬實垂
丹砂爲骨玉爲肌
客從海國探驪得
人向仙槎帶露移
造化無心含碩果
禎

三齋山房
卷之四
祥有意發南枝從知世德栽培遠實桂王槐好
自貽

爲愛君家植慶殊風雲時自護靈株瓊芽欲吐
春山艷玉顆仍藏蚌腹珠豈向五星聯夜色故
臨三象朗魁符樽前十日嬌重朶不減眉山老
檜圖

何麓翁先生入祀鄉賢過涿敬拜祠下

長楊並奏五雲叢雁塔聯鑣世講同箕尾故傳
星是說龍津尚識氣凌空三藩勛業烟霄迥敷

仍宮墻俎豆崇自是斗山咸仰止敬將蘋藻薦
高風

送榮縣李父母

上苑鶯花映珮環雙鳧西去渺難攀安仁彩筆
初臨蜀李耳青牛故出關馬度劍門春有色琴
鳴錦水鶴同閑徵書計日推高第問俗應知撫
字艱

壽孟封君

龍章彩服映朱弧汾晉今看有鉅儒經術自來

追董賈間身應喜遂江湖尋山着屐扶筇杖邀
月開尊載玉壺蘭桂滿前呈五色金莖斟酌海
籌初

題游少川永思卷

尺一榮衰下紫鑿 綸音感激幾悲歡風前萱
葉魂應斷夜半烏聲夢欲闌懿德煒煌彤史重
鴻恩溱漉墓泉寒承家况接尚書履雲路高飛
見羽翰

送張景銘侍御還蜀

擊筑高歌感慨生踈踈楊柳送君行精神豈爲
流言折肝膽真從 聖主明錦里文章司馬檄
隆中天地卧龍耕空江月色巴渝遠牛斗遙看
一劔橫

送程虛侗謫判兩浙鹺政

秋來旅思正蕭疎又向關河送別裾羈客懷鄉
桐葉老孤臣去國桂花初已知司馬能題柱豈
似虞卿強著書霄漢金莖應未遠春明杯酒莫
躊躇

三
癸卯八月十日同范學士翫月

天上清光半壁盈
遶階梧竹動秋聲
銀河倒湧千溪練
玉樹交輝不夜城
花謝徵歡開綺席
江樓度曲引鸞笙
明宵更喜圓輝滿
金谷飛觴倍有情

秋興

無端世事總浮漚
滬錦水漁竿老一丘
信是煙霞成獨往
細推天地亦虛舟
寒蕪過雨平臯淨
叢桂生風小院秋
更喜年來松菊茂
徐開三徑對

羊求

重陽前一日願悅菴憲使招飲高標山和

韻二首

清歌妙舞促飛觴
檻外秋葩映夕陽
琳闕逶迤雲霧暝
石壇宛轉薜蘿香
帆連遠浦煙低樹
霜落空江月吐芒
明日紫萸何處把
獨留郢雪佩幽芳

咫尺僊壇白玉觴
何期搖落荷春陽
誰人故側風前帽
有客先分屐齒香
霜壓彩毫垂海色
雲

王聲山房 卷之四
依龍氣動星芒慚予受簡無能賦惆悵黃花蒲
逕芳

榮縣尹樂于野考績二首

榮門城倚錦江隅分得王喬舊日鳧四野春陽
隨處徧百季凋瘵賴君蘇政成共訝鸞棲枳民
樂忻看雉引雛聞道漢庭徵駿茂絲綸早晚下
天衢

神明茂宰寂稱賢爲傍棠陰占一廛九里總爲
河水潤萬聲同是口碑傳帷中握箸誰應借臺
上披圖爾自先侯嘗督餉征播被薦江漢垂綸
風日好欣逢擊壤頌堯年

張玄羽掛冠歸蜀舟過嘉定以詩見投口
占和之

年來岩壑漫藏名三逕招攜野服輕白雪忽緣
紈素至青尊猶憶薊門行畏途轉覺人情變直
道從知貝錦生乘興江頭能鼓枻一簑烟雨話
昇平

江口紀行兼謝王李兩臺公祖

風塵漫汗任浮萍十載看山此再經禹益併功
開沃野并岷相湊東江靈雲光忽暎千巘碧兩
色飛來萬壑青自是舟師操絕技槎頭始信客
如星

送友人捧賀

濟濟諸侯集上臺五雲高闕敞蓬萊花明粉署
龍門在日照沙堤鳳跡來金鏡涵秋雲外曉仙
莫吐月蚌中開玉墀欲上賢臣頌筆札應從吉
甫裁

長安春興

薊門雲樹旦陰晴何處吹橫玉笛聲春到故園
花已放我來三月燕繞鳴風塵荏苒青山遠世
路微茫白髮生頰仰人間意無限欲從猿雀遂
初盟

送門人楊亮闕春詔省覲兼壽貞樂翁

詞賦多君似馬卿况兼玄草自家聲人知彩筆
凌雲健詔許江天泛斗行莖露色浮春酌蒲宮
袍香逐舞衣輕同歡福履川方至何限趨庭戀

闕情

夏日袁時詔立有秋何康侯溫長卿張德符同飲張園分得蕭字

珮聲初散紫宸朝
尊酒招携破窠天
濶浦雲當檻入
月高花影向人驕
玄言接郝情偏洽
白雪談心暑欲消
勝地雅遊真四美
瑤臺清迥夜森蕭

送張仁翁年伯赴南都國子學正

南都冠蓋擁樞門
始信先生道益尊
一代英賢

三樂地百年山斗俱瞻存
青衿化雨春應徧
赤日天衢手可捫
况是韋家經術茂
層霄劔履隔屏論

九日張瑞石太史招飲月壇同戴鎮樸比部鍾樓晚睡分得玄字

傑閣峻嶒萬象懸
遠開山岳淨秋烟
霜空叫月來寒鴈
木葉含風響暮蟬
仙梵杳從天際落
心期偏向酒杯傳
囊萁不負登高約
白雪吟成思獨玄

送周懷麓老師巡撫應天

大雅文章百代雄，久從柱下振清風。
陳謨密補山龍闕，分陝新收社稷功。
心並姬周追吐握，道于河洛闢鴻濛。
無言桃李成蹊後，師及淵源雨露同。

送李奎壁之任兼壽尊人李在田

萬里風雲喜壯遊，河陽花樹近皇洲。
九霄鵬鴉爭先翥，百歲椿萱耐晚秋。
簾幙風恬春酒滿，樓臺日近瑞烟浮。
佇聞三輔推高第，鳳詔芝輪更

幾周

送詹思理奉詔省覲

御苑烟霜照酒卮，五陵晴色動青驪。
蓬萊雙闕丹霄迥，閭闔千門紫氣垂。
相馬已酬燕市價，掄材真見鳳毛竒。
遙知擁駟承懽日，更勝籛金慰解頤。

送施爾霑還滇省覲

滇海雲開甲第新，傳家簪笏尚嶙峋。
青牛氣識臨關日，紫鳳祥占設帳辰。
誰道鹿門名並隱，喜

看麟趾慶方振歲星郎宿同光耀翹首台躔拱
北宸

送楊脩齡任洛南兼省覲還楚

鳧鳥翩翩出鳳城子雲詞賦擅西京相期絳帳
誰高足獨致青冥子一鳴天入秦分鴻雁羽賜
來宮錦彩衣榮驪歌更酌春明酒無限關河問
俗情

丙午秋陳獻甫年丈恤刑按部蜀南游峩
見訪

峨眉千仞矗秋雲飛磴凌空淨遠氛紅日半天
花雨落紫霞千片佛光分折松曉拂崑崙雪載
筆閑窺玉洞文勝地有靈誰攬結冷然仙籟坐
中聞

使者尋幽訪釣綸遂令光彩動江濱杏園舊識
凌雲氣蜀國今稱解網仁春入蠶叢瞻祭戟星
從劔外麗荀陳百年龕糲慙供客六傳飛揚滿
後塵

過青神聞余文峯先生脩縣志成蕪承以

詩見寄賦此志謝

四壁圖書見大方
草玄無事日初長
風流嵇阮推龍性
藻鏡班揚避鴈行
藜火清炷來太乙
星華平野近文昌
山齋夜襲瑤函滿
手握榆花喜欲狂

丙午中秋孫明府見惠月餅

種竹穿苔月滿林
小山叢桂薄秋陰
檄書忽到加餐字
國士寧忘解佩心
萬井烟光澄素練
千家機杵動清砧
穎川信有神明宰
棠樹春來好

易尋

次塗山龍使君惠臣舫東下志謝

野浦維舟候曉寒
漫勞旌蓋到江干
自憐馬走空萍梗
何意龍門借羽翰
千里錦官春樹渺
高城白帝楚雲寬
滄波西望頻回首
明月青山天際看

花林驛晚眺

疎林荒館兩茫然
花片離離上客船
江草冷涵三月雨
寺楊晴撲一溪煙
天浮故國人初遠
枕

王麓山房 卷之四 八十三
對寒潮夜不眠別後籬前幾枝菊移文慙負北
山篇

荆門道中別同侶兼寄山中親友

客路風塵共舉觴海雲高澗暮烟長黃陵樹色
生寒雨青草灘聲帶夜霜敢謂琴樽同汗漫猶
將松菊憶柴桑天涯回首懷朋好日數南來鴈
幾行

九日揚爾華年丈招飲詩社偶卧病兼阻

雨述

羈跡懷歸已倦游重陽風雨不勝秋城頭朔氣
吹寒角客裡霜華落蒯緱蕭瑟一身常卧病摩
娑短髮罷登樓玄亭此日羣星聚惆悵山陰雪
夜舟

諸兄弟游天寧寺阻雨余不能往分寄悲

字

十里烟蘿薜荔垂琳宮寶塔更逶迤風生蘆荻
汀沙晚雨濕關河過雁遲日暮把萸憐自健歲
寒有菊莫深悲一尊馬首衝泥好肯許明朝倒

三齋山房
卷之四
接離

送余澄川太學還蜀兼壽兩尊人

薊門烟色縮離情
杯酒春明送別程
衝雪不辭江月冷
登臺還見海霞生
匏笙坐擁三珠樹
錦水新翻一鳳鳴
賦就長揚須早獻
傳家經術待玄成

丁未九日過長壽龔相守侍御招飲夜集
秋空迢遞送征鴻
栢府招携夜讌同
入座涼風吹紫玉
當筵明月照清虹
十年湖海登龍願
萬

里雲霄捧日忠咫尺
蓬萊隔烟渚
習家池館翠微中

黃九石年丈請假諸兄弟攜具相訪以
詩見却依韵奉荅余多病亦有歸田之
志情見乎詞

喜逢堯運及垂衣
何事連期默掩扉
畏路風塵隻眼過
愁心湖海一鴻飛
青尊對客寒相訊
白壁投人事已違
斗酒未須題鳳去
啣杯此夜好相依

三齋山房 卷之四 全
蕭颯天涯新授衣晚風吹雨入柴扉却因江鴈
衝寒起翻悔巴雲出岫飛說劍交情堪獨許聚
星往事詫相違艱難世事頻搔首惆悵河梁喜
整依

送范給諫用封河南

新恩帶礪指山河鳳闕傳宣擁玉珂瑣闥文章
經國遠宮牆桃李入門多太行石髓春相待盤
谷僊雲晚自過咫尺還朝有封事回天應借
魯陽戈

壽傅道長封君

弧帨雙懸分壽卮何論瓊島與瑤池鯉庭貽翼
青箱舊豸繡承歡采服宜應運甫申鍾嶽氣齊
眉梁孟擁春曦更將日月升恒祝共續南山獻
壽詞

卿雲旭日照蓬瀛畫錦堂開喜氣生瑞筴七旬
同福履閒身千載際昇平雲間丹鳳銜金冊海
上青鸞度玉笙霖雨佇聞勞夢卜台星應傍壽
星明

王麓山房
卷之四
三
贈別爾弼世丈

薊門晴色動秋光獨綰銅符出建章九月嚴霜
飄朔氣萬家烟火候春陽朱弦敢謂能同調青
桂相期晚共將政最此行應努力雲霄鳧鳥見
高翔

壽韋太封君初度

玉陛新承寵渥偏彩輿親荷主恩還請看于
駟高門日共羨韋經啓後年錦里德星冠蓋集
湖山春色棣華鮮秋深叢桂仍堪把杖履逍遙

鶴髮玄

道一符為李同野先生賦

龍門海宇鬱嶙峋草木猶霑化兩新一代魁名
推國棟百年文運屬天申枝褰彩鳳摩霄翼色
動寒驪耀日鱗取是先生培厚植玉柯垂蔭滿
庭春

奉壽 綸褒貞孝姊兄六袞

姆儀節婦喜兼成鳳勅鸞書表懿貞熊膽幾
年酬苦志栢舟千載紹芳名冰霜有操松筠老

三
卷之四
河漢無塵寶發明忠孝家聲真不媿循環花甲
再長庚

送佾雲嶽侍御巡漕

藜火文章爾擅場又從柱下藉聲光碧鷄詞唱
千秋雪駘馬花飛五色霜拓簡祥烏隨使節憂
時諫草托長楊漢家轉餉推蕭相佇見天門八
翼翔

前年獻賦奏西京詞苑爭傳繡虎名今日玉堂
多氣色須君寰宇更澄清秦淮月轉吳檣出海
嶽秋高法曜明聞道東南民力盡行行應慰濟
川情

五言排律

送徐雅池給諫 冊封 晉藩

丹鳳啣新命雲霄遣侍臣
 恩光懸日月帶礪切
 絲綸桐葉遙分晉函關
 近入秦川原歌舜澤寶
 玉錫周親騎歷中條樹
 花明汾水春文章光象
 締冠蓋動簪紳驛路風
 生旆關山月照人吏民
 迎駟馬星彩映華輪劍
 閣銘何壯梁園賦轉新
 旋旌莫經歲明主待敷
 陳

崇善祠十二韻為 劉復齋老師贈

樓閣瀛洲迥城闈草樹連霽雲明帝座寶界貫
星躔日月開雙棟風雲拱四天飛霞崇紫府香
象擁青蓮霧捲丹楹外烟澄桂椀邊鳥聲僊樂
細鰲背佛燈懸燕喜齊王母精誠格上玄貺靈
來玉局抱送得金仙門駟功應遠公槐兆久傳
窺簷看燕賀調鼎見鶯遷跡與松高合名同夢
卜賢佇聞歌吉甫台象五雲偏

奉壽陽翁莊太公祖

五言律五十韻

昭代推全盛儒宗起八閩元精瞻誕岳爽氣自

殊倫劔履三朝貴乾坤五福純文章開要眇典
則潤敷陳蘊籍通春殿光輝盪海垠詞華傾後
輩風雅揖先民朗昱珪璋彥孤稜瑣闥晨王猷
需黼渙袞闕賴咨詢已秉羔羊節尤歌召伯仁
持衡留藻鑑雅化屬銓甄文價龍門迥玄珠象
罔神薇花時隱映繡幃轉嶙峋烽火銷傳箭恩
波起涸鱗望元歸北斗澤亦擬鴻鈞薄海思霖
雨高趨領縉紳兩都喉舌地八座表儀身玉鼎
和羹美金莖濯露新綠圖呈豈悌紫宙叶清淳

大業標熙世閑情賦采真明時辭冕綬鄉思動
秋尊辟穀江湖遠看山歲月親黃金疏傳賜綠
野晉公隣載德延昌緒傳經啓後塵鳳輝遐欲
覽龍性本難馴偃仰清源上登臨紫帽濱有時
千象締百里聚陳荀五嶽恣游履三山把釣緡
綺園人再見更老德堪遵競蒸青紺紫縣珂白
璧珍秩宗光典禮蘭省上星辰益部人文啓群
材郢匠掄登壇人嶽嶽講德士彬彬化偃羗戍
俗風移蜀漢津漸看盛桃李轉見下絲綸推

朝堂重分猷屏翰頻移書來黠醜飛檄諭實
集定歌蜚鴈招安睹聚鶉公為衆父父人祝百
春春重積寧無始全昌信有因簡書方夙夜
家慶正駢臻戀闕陳金鏡瞻雲賦大椿秦符
明六曜春酒介千巡步履憑鳩杖响噓羨鳥伸
鴻冥真矯矯麟趾日振振戲彩翔宮錦微蒲動
玉宸雲間青雀使花下紫綸巾玉樹凌春茂
祥芝繞砌勻詩人歌福祿寶軸紀松筠如崗復
如阜生甫及生申遙從大夫後搦管效封人

題沈頤真先生崇德錄十五韻

清淑扶輿賦雲霄闕闕崇聲華隆舊鎬禊祉肇
高崧抗志風塵外冥心典索中雲鵬靈翼迥天
馬驥群空姱德追曾閔英詞沛錦虹建茅前國
士擢桂擅文雄百家囊盡括四壁罄長窮卻餽
存瓌節流光載顯融庭槐籠曉日門駟靄春風
蘊籍通三殿光輝動八鴻握符輕唾手製錦美
良工禹會甘棠舊堯階補袞隆德餘祥運洽和
渥慶緣同月旦塵寰表星精箕斗東千秋崇俎
豆一劔倚崆峒零露沾秋草斜陽照遠楓新碑
高馬鬣佳氣日苒苒

七言排律

送盛子寬

宮諭

冊封

肅藩

閭闔千門散御香
詞臣持節下明光
珪桐錫命朝辭闕
宮錦承恩晝過鄉
螭陛新分周寶玉
燕然重勒漢文章
雲開鳩鵲星槎遠
地接祁連塞草黃
天上宗盟傳帶礪
軍前檄草挾風霜
聲名匡鼎中朝望
經術韋家異代光
負琴有橋題駟馬
占星逢使指河梁
函關夜識真人氣
岐首時同鳳鳥翔
別後輜軒莫留滯
石渠藜火待輝煌

五七言絕

嚴君平賣卜處

公以卦意教人忠孝
幾見天地之心者

風露澹清晝簾間獨有人
盡將消息意遍作錦

江春

錦江清見底高浪且凌空
詎知簾下叟不與斗

牛通

宿義昌驛

旅宿依青嶂嚴程赴遠期
牛羊下深巷烟火隔

茅茨

東征凱歌閣試

扶桑東盡挂彤弓橫海樓船十萬雄自是王師
憑一怒不勞魏絳再和戎

白草黃雲塞月昏洗刀鴨綠夜潮渾天涯萬里
車書會直取神嵩作北門

醫無閭外陣雲收七閱龍堆塞草秋但使撓槍
能迅掃漢家何吝冠軍侯

金錢特賜下雲霄拔續親酬百戰勞干羽共傳
文德遠宮中春酒泛蒲萄

香山公主發引輓歌

瑤臺十二玉欄干仙禁名花映掌寒哀絳一聲
鸞影寂寞衣空向月中看

薊門風急慘雲駢天闕宵沉婺女星聲斷玉簫
蒿里暗人間何處吊湘靈

長門怨

紅芳落盡暗香遲懶向東風話別離曉起酒醒
憑檻立鷓鴣飛遍海棠枝

太液春深燕子飛一翻花事到薔薇潛身坐倚

梧桐樹學得簫聲待鳳歸

宮詞

佳氣層層絳闕平東隅日上彩霞明
銅龍視膳開金鑰手執牙籤繞隊行
枝頭黃蝶兩三叢桐子花開晚更紅
乞得內園金芍藥一時着意向東風

玉泉寺相傳泉源在峩山

冠玉山前野水秋隔林何處是溪頭
峩眉一望三千里猶有寒流洗客愁

西山訪禪者

野寺空林對夕曛桃花流水隔溪聞
禪心片月寒無影坐向晴牕領白雲

俚言十二首續題扁舟五湖卷送可亭楊先生偕文弱世丈游澗

五色春雲玉殿生長安初日滿金莖
文星此夜衝南斗紫氣遙看照赤城
三月江南烟雨平柳花初點水為萍
凌風貫月星槎遠一夜寒潮杜若生

澄澄碧漢跨虹橋春霧苑籠隔海遙時有僊人
騎白鹿芙蓉峰上坐吹簫

到處鸞花二月春萬千紅紫競芳辰潮頭望入
棲霞嶺摘得三芝伴羽人

天目峰頭謁紫君焚香夜寫赤霄文住山道士
眉如雪歸贈西湖幾片雲

雲水千重度紫壇天台石壁挂飛湍仙都委宛
誰人識時聽步虛山月寒

孤山橫在浦雲邊下有歐公六一泉移取桃源
花萬樹紛紛紅雨落尊前

琪樹蒼蒼綵日紅三天洞暗相通誰道八
門前過折取蟠桃寄若翁

紅草青林日未曛閒乘隻鳳禮茅君向來黃鶴
仙入遂吹入鰲亭月下聞

中台佳氣遶庭闈駉馬行行路有輝何用羸金
誇舊里錦衣全勝老萊衣

熒熒袖裏夜光珠疑是驪龍照海隅醉向林頭
張綠綺春風一曲鳳將雛

寒雨春江曉過吳天涯去住兩躊躇相聞不必
目南鴈雲裏啣來有素書

高星士

白首長餐海上霞春風開遍石林花簾前昨日
來車馬知是成都賣卜家

心空上人曩謁黃慎軒先生得其禪言數
紙懷麓張司諫為之序心空游峨眉以
示余且索詩余甫泔沐還里未暇筆札
集唐句二章贈之

曉開天籟發清機李頎却捧玄珠向翠微姚鵠
岐路相逢無可贈劉長卿重嗟筋力故山違李
頎

半夜中峰有磬聲盧綸寒雲孤木伴經行崔峒
溪頭雀樹春常在宋邕縹緲如聞子晉笙杜牧

